

Pro rectificatione Metarum Regni cum vicinis Provinciis; renovato Articulo 66. Anni 1659. et aliis ibidem citatis; Commissarii denominantur.

Articulus 23.

§. 5. Circa Carinthiam et Carnioliam; Reverendissimus Dominus Martinus Borkovich, Episcopus Zagrabiensis; vel loco illius, Adm. Reverendus Dominus Michael Boczak, ejusdem Capituli Praepositus major: Magnificus Nicolaus Keglevich: Egregii Balthasar Wragovich, Vice-Banus: Petrus Antolchich, Regni Croatiae Protonotarius. Item unus ex Vice-Comitibus Comitatum Zagrabiensis, vel Varasdiensis.

Judicia Octavalia, tam majora, quam minora et extraordinaria; Appellationumque Revisiones, ubique statis suis temporibus celebrentur: Ac pro Superiori Ungaria, ad Tabulam Regiam Praelatus et Baro denominantur.

Articulus 28.

Ut laudabilis et Deo grata Juris et Justitiae Administratio, pro cujusvis causae aequitate, non tantum in Comitibus administraretur, sed etiam Judicia Octavalia tam majora, quam minora; sicut et extraordinaria et Appellationum Revisiones (non obstantibus quorumvis causis suis diffidentium contrariis votis et opinionibus; aliisque privatis impedimentis) tam in superioribus, quam in inferioribus Regni hujus Partibus, ac in Regno quoque Croatiae et Sclavoniae, statis suis temporibus per suam Majestatem; vel illa absente aut impedita, cum consensu ejusdem per Dominum Regni Palatinum; in Croatia vero per Dominum Comitem Banum, suo modo promulgata celebrentur; articuli quoque Annorum praeteritorum, uti Articulus 41. Anni 1659., Art. 76. An. 1649., Art. 14. An. 1635., Art. 70. An. 1609. superinde jam editi, strictius observentur; unanimiter conclusum est.

Contra Turbatores et non Admissores Judiciariarum Executionum ac Bonorum judicialiter Executorum Reoccupatores; poena cum Processu statuitur.

Articulus 31.

Ad coercendam porro potentiorum in non admittendis et turbandis Judiciariis Executionibus, vel vero Bonorum jam judicialiter Executorum, propria Auctoritate fiendis violentis Reoccupationibus, hactenus fere sibi impune vendicatum licentiam; Status et Ordines renovant Artic. 3. Anni 1608. post Coronationem editum:

§. 1. Cum ea declaratione; ut hujusmodi Judiciariarum executionum non Admissores, vel earundem Turbatores, praeter poenam Homagiale 50. Marcarum gravis ponderis, per Judicem causae ipso facto exequendam; etiam in refusione expensarum, in executionem praescriptorum Bonorum, penes assisten-